

## Jardbaietid *(Autor: Nis Albrecht Johannsen d. J.)*

Deer bai rötje än radiis,  
Änääder di saloot,  
Läit min jardbaipårådiis –  
As dåt ai en stoot?

Lök! en bai as Pükens hödj  
Lör't deer uner üt.  
Kam mån jur, jü pååset gödj  
Önj sün luurlatj snüt.

Jardbaie smååge wan we hål,  
Dåt as fåliwas;  
Uk jü troosel löret ål,  
Weer deer niimen as.

Lätj's mån, wan's dåt mätj mån wiitj –  
Da san duch mån liind;  
Floitet's mjarne fiidelifiitj,  
Sü san's ouffertiind.

Mjarne lade's wi önj't ra  
As parle aw en trädj;  
Dan nam ik en oomer ma,  
Di fäit sträägen mätj.

Baie diling, baie mjarne  
Slaaw ik dan tu hüs;  
Tääte, meem än uk da bjarne  
Släke jam e müs.

Åål san's såt, deer's niimen måål,  
Än dåt jeeft nån strid.  
Häin we duch mån aw e wråål  
Åltid jardbaietid.

(In: Johannsen, Nis Albrecht. 1956. *Beerid*. Naibel: Andresen. S. 66-67.)